

Morning Dogri (NSD) Bulletin 14-08-2025

आकाशवाणी

खबरां पूनम डोगरा कोला

1. राष्ट्रपति द्रौपदी मुर्मू होर स्वतंत्रता दिवस दी पूर्व संज्ञा अज्ज राष्ट्र गी संबोधित करडन।
2. भारत नै 100 गीगावाट सोलर पी.वी माड्यूल निर्माण छमता च ऐतिहासिक उपलब्धि हासल कीती ऐ, प्रधानमंत्री होरें इसी स्वच्छ उर्जा गी लोकप्रिय बनाने च बड़ी कामयाबी करार दित्ता।
3. उत्तराखंड नै फौज थमां वापस आए दे साबका अग्निवीरें गी सरकारी सेवाएं च सिद्दी भर्ती लेई 10 प्रतिशत आकर्षण दी मंजूरी दित्ती ऐ।
4. दिल्ली-एनसीआर च आवारा कुत्तें दी समस्या पर सुप्रीम कोर्ट दे हालिया हुक्म पर अज्ज परतियै समीक्षा कीती जाग।
5. जम्मू-कश्मीर, हिमाचल प्रदेश ते आंध्र प्रदेश च अज्ज भारी बरखा दी पेशनगोई।

<><><><><><>

President

राष्ट्रपति द्रौपदी मुर्मू होर अज्ज 79में स्वतंत्रता दिवस दी पूर्व संध्या उप्पर राष्ट्र गी संबोधित करडन। एहू संबोधन संज्ञा 7 बजे थमां आकाशवाणी दे सब्भनें राष्ट्री नेटवर्क उप्पर प्रसारित होग। एहू दूरदर्शन दे सब्भनें चैनलें पर हिंदी ते अंग्रेजी च प्रसारित होग। एहूदे मगरा दूरदर्शन दे क्षेत्रीय चैनलें आसेआ क्षेत्रीय भाषायें च बी एहूदा प्रसारण कीता जाग। आकाशवाणी अपने सरबन्धत क्षेत्रीय नेटवर्क उप्पर रातीं साड्डे 9 बजे थमां इलाकाई भाषायें च एहूदा प्रसारण करोग।

<><><><><><>

President-Amrit

राष्ट्रपति द्रौपदी मुर्मू होर अज्ज राष्ट्रपति भवन दे अमृत उद्यान दे ग्रीष्मकालीन सलाना उत्सव दा उद्घाटन करडन। एहू शनिवार थमां बड्डलै 10 बजे शा संज्ञा 6 बजे तगर खुल्ला रौहग। एहू 14 सितंबर तगर चलोग। राष्ट्री खेडू दिवस दे मौके पर 29 अगस्त गी खडारियें गी अमृत उद्यान च विशेष प्रवेश मिलोग ते शिक्षक दिवस दे मौके उप्पर 5 सितंबर गी शिक्षकें गी बी अमृत उद्यान च विशेष प्रवेश मिलोग।

<><><><><><>

PM-I-Day

राष्ट्र कल 79मां स्वतंत्रता दिवस मना'रदा ऐ ते प्रधानमंत्री नरेंद्र मोदी होर दिल्ली दे लाल किले थमां इस समारोह दा नेतृत्व करडन। मोदी होर ऐतिहासिक धरोहर दी प्राचीर थमां

राश्ट्री तिरंगा चाढ़डन ते राश्ट्र गी संबोधित करडन। राश्ट्र 2047 तगर विकसित भारत दे सरकारी विजन गी साकार करने दी दिशा च तेजिया कन्नै अगगे बधा'रदा ऐ। इस्सै लेई इस ब'रै समारोह दा विषे ऐ-“नमां भारत”। एहू समारोह इक समृद्ध, सुरक्षित ते साहसिक नमें भारत दे निरंतर उदय दा चेत्ता करने ते प्रगति दी बत्ता उप्पर अगड़े बधने लेई नमी उर्जा प्रदान करने दे इक मंच दे रूप च कम्म करोग।

<><><><><><>

Joshi-Solar

भारत नै मॉडल ते निर्माताएं दी नमें सिरेआ तैयार लिस्ट ए.एल.एम.एम दे तैहत 100 गीगावाट सोलर पी.वी माड्यूल निर्माण छमता च ऐतिहासिक उपलब्धि हासल कीती ऐ। एहू 2014 च छड़ी 2 इशारिया 3 गीगावाट ही। प्रधानमंत्री नरेंद्र मोदी होरें इस उपलब्धि दी सराहना करदे होई इसी आत्मनिर्भरता दी दिशा च इक सराहनेजोग ऐतिहासिक उपलब्धि करार दिता ऐ। इक सोशल मीडिया पोस्ट च प्रधानमंत्री होरें आखेआ जे एहू निर्माण छमताएं ते स्वच्छ उर्जा गी लोकप्रिय बनाने च भारत दी कामयाबी दा सबूत ऐ। एहूदे पर केंद्री नमीकरण उर्जा मंत्री प्रहलाद जोशी होरें आखेआ जे उंदा मंत्रालय इक निगार, आत्मनिर्भर ते सौर उर्जा पर आधारित तंत्र कायम करा करदा ऐ।

<><><><><><>

Uttarakhand-Cabinet

उत्तराखंड कैबिनेट नै फौज थमां वापस औने दे बाद साबका अग्निवीरें गी सरकारी सेवाएं च सिद्दी भर्ती लेई 10 प्रतिशत आरक्षण दी मंजूरी देई दिती ऐ। मुख्मन्त्री पुष्कर सिंह धामी हुंदी अध्यक्षता च लग्गी दी बैठका च एहू मंजूरी दिती गेई। एहू आरक्षण राज्य सरकार दे

मतैहत सेवाएं च ग्रुप सी दे वर्दीधारी औहदें कन्नै सरबन्धत ऐं साबका अग्निवीरें गी सिद्दी भर्थी च शारीरिक दक्षता यानि फिजिकल टेस्ट नेई देना पोग।

<><><><><><>

SC Stray Dogs

दिल्ली-एनसीआर च आवारा कुत्तें दी समस्या पर सुप्रीम कोर्ट दे हाल च जारी हुकमै दी अज्ज परतियै समीक्षा कीती जाग। प्रधान न्याधीश होरें एहदे लेई न्यायमूर्ति विक्रम नाथ, न्यामूर्ति संदीप महता ते न्यायमूर्ति एन.वी अंजारिया दी त्रै मिम्बरी पीठ दा गठन कीता ऐ। इस मामले दी सुनवाई अज्ज होनी ऐ। 11 अगस्त गी न्यायमूर्ति जे.बी पारदीवाला ते न्यायमूर्ति आर महादेवन हुंदी पीठे आवारा कुत्तें दी समस्या पर सख्ती नै संज्ञान लैंदे होई राष्ट्री राजधानी दिल्ली क्षेत्र दे सब्भनें हिस्सें थमां आवारा कुत्तें गी हटाने ते उनेंगी नगर-निगम अधिकारिएं आसेआ बनाए जाने आहले कुत्ता आसरमें च रखने दा हुकम जारी कीता हा। हुकमै च आखेआ गेआ हा जे दिल्ली दे सारे इलाकें गी आवारा कुत्तें दे खतरें कोला मुक्त कराने दे कम्मै च कुसै चाल्ली दा समझौता नेई कीता जाना लोड़चदा।

<><><><><><>

ED-Money Laundering

पैहे दे गैर कनूनी लैन-देन पर तक्क रखने ते माली नियम लागू करने सरबन्धी निदेशालय ई.डी नै मनी लांडरिंग दे इक मामले च कल मुम्बई च 4 लोकें गी गिरफ्तारा कीता ऐ। इन्दे च वसई विरार नगर निगम दे साबका कमिशनर अनिल पवार, बरखास्त कीते गेदे नगर निगम दे उपनिदेशक वाई.एस रेड्डी, बिल्डर सीताराम गुप्ता ते उंदे भतरीये अरूण गुप्ता शामिल ना। इनें सब्भनें पर नालासोपारा च सार्वजनिक सेवाएं लेई बक्ख रक्खी गेदी 60 एकड़ सरकारी ते प्राइवेट जमीं पर 41 ईमारतें दे अवैध निर्माण च पैहे दे गैर कनूनी लैन-देन दा आरोप ऐ।

इनें आरोपिएं गी सांझी पुच्छ-गिच्छ दे बाद मुम्बई च हिरासतै च लैता गेआ ते अज्ज उनेंगी पी.एम.एल.ए अदालतै च पेश कीता जाग।

<><><><><><>

CEA-US

मुख्य आर्थिक सलाहकार वी. अनंत नागेश्वरन होरें गलाया ऐ जे भारतीय निर्यात उप्पर हाल च गै लाए गेदे अमरीकी टैरिफ दा असर थोड़ी देर तगर गै रौहग ते एहू इक्क जां दो तिमाहियें च घट्ट होई जाग। कल मुम्बई च बोलदे होई उनें आखेआ जे रत्न ते गैहनें, झीगां ते कपड़ा जनेह क्षेत्रें गी शुरूआती झटका लगा'रदा ऐ ते पर अर्थ बवस्था उप्पर एहदा लम्में चिरें तगर प्रभावित सीमित रौहग।

<><><><><><>

Giriraj-Textile

केंद्री कपड़ा मंत्री गिरिराज सिंह होरें कल नमीं दिल्ली च विश्व बपार चुनौतिएं कन्नै निब्वड़ने लेई उद्योग जगत दे प्रमुख उद्यमिएं कन्नै इक बैठक कीती। बैठका च उनें उभरदे वैश्विक बपार दी मजूदा हालात दी समीक्षा कीती। उनें आखेआ जे चुनौतिएं दे बावजूद बी भारत दा कपड़ा उद्योग 2030 तगर 100 अरब अमरीकी डालर दे निर्यात लक्ष्य गी हासल करी लैग। बैठक च बधदे अमरीकी बपार शुल्क ते इस क्षेत्र लेई इक भरोसेमंद ते भविष्य केंद्रित रणनीति तैयार करने दे बारै च बी तफसीली चर्चा कीती गेई।

<><><><><><>

Heavy-Rains

मौसम विभाग नै मध्य प्रदेश, ओडिशा ते जम्मू संभाग दे कई हिस्सें च कल्लै तोड़ी भारी थमां बड़ी भारी बरखा बरने दी चेतावनी जारी करदे होई लोकें गी गुजारिश कीती ऐ जे ओहू इस सरबंध्यै च लोड़चदी एहतियात बरतन। आकाशवाणी दे जम्मू संवाददाता दी रिपोर्ट मूजब मैहकमे नै आखेआ ऐ जे खित्ते दे कई इलाकें च इस दरान बदल घनोए दे रौहडन ते हौली थमां दरम्याने दर्जे दी बरखा बरग। मौसम विभाग नै जम्मू खित्ते दे कई जिले, जियां रियासी, उधमपुर, जम्मू, साम्बा, कठुआ, डोडा ते राजौरी च भारी थमां बड़ी भारी बरखा दे असार जताए न। मौसम विभाग नै किश इलाकें च चानचक्क हाड़ आने, ल्हास-पस्सियां पौने ते प्हाड़ें परा कुप्पड़ पौने दी शैका बी जाहिर कीती ऐ। किश थाहरें पर अंधी झक्खड़ झुल्लने ते शमानी बिजली मिलकने दे असार बी दस्से गे न।

<><><><><><>

AIP-Rains

आंध्र प्रदेश च भारी बरखा करी अमा जन-जीवन प्रभावित होआ ऐ। एहू भारी बरखा बंगाल दी खाड़ी दे पच्छिम मध्य ते ओहूदे कन्नै सटे दे उत्तर प्रदेश च उत्तरी आंध्र प्रदेश ते दक्खनी ओडिशा दे तटें पर बने दे इक्क निम्न दबाऽ क्षेत्र करी होई ऐ।

<><><><><><>

Vibhajan-Day

अज्ज विभाजन विभिषिका स्मृति दिवस ऐ। एहू ध्याड़ा 1947 च भारत दी बंड दरान लोकें आसेआ जरे दे दुखे-कसालें ते तकलीफें गी चेत्ता करने लेई मनाया जंदा ऐ। अज्जे दे रोज देश उनें सब्भनें लोकें गी श्रद्धांजलि भेंट करदा ऐ जिनें 1947 दी बंड दरान अपनी जिंदू दा बलिदान दित्ता ते बेस्थाबियां जातनां सैहन कीतियां। देश दी बंड दे कारण अपन जान मोहाने आहले ते अपनिएं जड़ें थमां दूर होए दे लोकें गी श्रद्धांजलि दे रूपै च 2021

च भारत सरकार नै 14 अगस्त गी विभाजन विभिषिका स्मृति दिवस दे रूपै च मनाने दा फैसला लैता हा।

<><><><><><>

Football

सुब्रतोकप अंतरराष्ट्री फुटबाल टूर्नामेंट दे 64में संस्करण च 106 टीमां हिस्सा लैडन। टूर्नामेंट 19 अगस्त शा 25 सितंबर तगर दिल्ली-एनसीआर ते बेंगलुरु च आयोजित कीती जाग। एह टूर्नामेंट 19 अगस्त गी दिल्ली-एनसीआर च 17 बरें शा घट्ट उम्मी दी कुडियें दे मुकाबले कन्नै शुरू होग। 15 बरें शा घट्ट उम्मी दे जागतें दा मैच 2 सितंबर शा बेंगलुरु च आयोजित कीता जाग जदके प्रतियोगिता दा अखीरी गेड़ 17 बरें शा घट्ट उम्मी दे जागतें दे मुकाबले 16 सितंबर शा दिल्ली-एनसीआर च खेड्डे जाडन।

<><><><><><>